

Exemplô rem declaratum imus. Si cui per gratiæ lumen extraordinarium revelatum sit, *Deum esse omniscium*; alteri verò idem lumine naturæ apodicticè demonstratum: Uterque clarè distinctéque, ac certò & infallibiliter eandem, cùm eadem sit enunciatio, veritatem percipiet: hæc autem sibi ipsi nec contraria erit, nec in unô majorem, quàm in aliô, pariet certitudinem, cùm uterque nullô modò possit dubitare. Videantur etiam de his quædam cap. 8.

C A P. VI.

Philosophiam esse infallibilem S. Scripturam interpretandi Normam ostenditur, 1. Argumentis, 2. Continuâ Theologorum Praxi, & 3. Exemplis.

I. **H**Actenus Controversiæ explicuimus subjectum & Prædicatum, jecimusque fundamenta, quibus totam Demonstrationis nostræ molem impræsentiarum superstructum ibimus, & quidem facili negotiô; sponte enim suâ sese cuilibet, dicta animo recolenti, & accuratè attendenti oggerit. Demonstravimus namque cap. 4. omnes locorum Scripturæ veritates, esse etiam veros sensus, ac omnes eorum expositiones, quæ veritati non congruunt, esse falsas: adeoque verum S. Literarum Interpretem esse, qui veritates orationum in iis contentarum potest eruere, ac se eruisse ostendere, nec non earundem ab aliis adornatas interpretationes vero non consonas esse detegere, ac demonstrare. Cùm igitur, ut præcedenti capite docuimus, Philosophia sit vera, certa, ac indubitata Rerum notitia, ex principiis naturæ lumine cognitis deducta, atque apodicticè demonstrata: Poterunt hæc & locorum Scripturæ veritates certò erui, erutasque esse demonstrari, & eorum ab aliis factæ explicationes, num vero convenient, an repugnent, explorari, ac hujus vel illius notæ esse, indubiè ostendi. Unde evidentissimè consequitur, illam tam sacras Literas interpretandi, quam interpretationes explorandi certam esse atque infallibilem Normam; ac præterea illum, qui hæc est instructus, & cui hujus vera ac sincera affulsit lux omnès verbi divini Interpretis partes rectissimè dignissiméque sustinere posse. Quod sanè non ita intellectum volumus, ac si is, qui Philosophiam à limine solùm salutavit, ac primoribus degustavit labris, adeoque liberalium artium atque disciplinarum cognitione parum aut mediocriter tantùm tactus est, omnia, quæ in sacris Scripturis occurrunt, etiam difficiliora atque abstrusiora penetrare, intelligere atque explicare posset: Sed tantummodò ea, quorum notitiam sibi jam philosophandò